

STATUTS

dalla

Societad Ovra electrica Lumbrein

I. Disposiziuns generalas

Art. 1

Num, sedia

Sut il num „Societad Ovra electrica Lumbrein“ (silsuenter numnada „SOEL“) exista ina societad enscretta el register da commerci per in cuoz nundeterminau el senn dad art. 828ss. DO cun sedia a Lumbrein.

La SOEL ei ina corporaziun da dretg privat cun participaziun dalla vischnaunca da Lumbrein.

Art. 2

Intent

Igl intent dalla SOEL ei da construir, renovar, reparar, menar e mantener comunablamein – el senn d'in agid per gidar sesez – la reit da providiment electric ella vischnaunca da Lumbrein (ed eventualmein en ulteriurs territoris), sco era da vender electricidad e porscher tut ils survetschs respectivs a commembers ed a tiazas persunas. Sch'il recav lubescha, survegnan ils commembers che retrain energia ni fan diever dils survetschs colligai cun quella, tariffas pli favoreivlas el rom dallas pusseivladads legalas. La SOEL sa construir e/ni menar implonts per producir energia surtut el sector dallas energias regenerablas ed auters implonts da providiment d'energia sur conducts ni separticipar a tals, sco era far sclariments corrispundents.

La SOEL sa construir filialas e societads afiliadas en Svizra e separticipar ad autras interpresas en Svizra, sco era far tut

las fatschentas che stattan en in connex direct ni indirect cun siu intent. La SOEL sa cumprar, engrevgiar, vender ed administrar en Svizra proprietad funsila. Ella sa era far finanziaziuns sin agen quen ni sin quen jester, e far tut las fatschentas adattadas per promover igl intent dalla societad ni per facilitar sia ademplida.

II. Commembradi

Art. 3

Recepziun

Commember sa daventar mintga clienta e client dalla SOEL che ha siu domicil ella vischnaunca da Lumbrein el rom dil territori communal hodiern.

La recepziun sco commember succeda sin fundament d'ina declaraziun d'adhesiun en scret cun renconuschientscha dils statuts. Ina tala declaraziun survegnan ils clients ensemen cun il quen corrispundent l'emprema ga ch'els retrain prestaziuns dalla SOEL.

Il commembradi scada automaticamein, aschiprest che la reit da providiment electrica vegn buca pli duvrada. Sch'enzatgi renunzia facultativamein al commembradi, sto la disdetga en scret vegnir inoltrada per la fin d'in onn da gestiun, risguardond in termin da disdetga da treis meins. Resalvaus resta art. 9.

Art. 4

Dretgs ed obligaziuns

Mintga commember dalla SOEL ha il dretg da far diever dalla reit da providiment electrica e da retrer energia electrica el rom dall'incumbensa da providiment dalla SOEL.

Ils commembers han ils medems dretgs e las medemas obligaziuns, aschilunsch che la lescha prevesa buc

in'exceptiun. Surtut ha mintga commember ina vusch alla radunonza generala.

Il commembers ein obligai da defender ils interess dalla SOEL en buna fei. In commember che violescha grevamein sias obligaziuns sco commember dalla SOEL, sa vegnir exclus entras l'administraziun. Ultra da quei sa el da tut temps vegnir exclus sin fundament da motivs impurtonts.

Commembers che sortan dalla societad han il dretg d'ina restituziun dils screts da participaziun pagai dad els. La SOEL ei autorisada da scuntrar pretensiuns visavi in commember cun ses screts da participaziun. La vischnaunca da Lumbrein ha negin dretg d'ina restituziun da ses screts da participaziun, aschilunsch ed aschiditg che la SOEL ei buca dissolvida. Ella survegn el rom dalla disposiziun da dissoluziun e da liquidaziun (art. 17) ils mieds finansials corrispundents; aschiditg vala in dretg da restituziun sco prorogaus. Resalvaus resta art. 9.

III. Disposiziuns finansialas

Art. 5

Screts da
participaziun

La SOEL emetta screts da participaziun sin il num dil possessur; la valeta nominala munta a CHF 100.—. Mintga commember sto cumprar silmeins in scret da participaziun ed astga cumprar maximalmein 20 screts da participaziun. Questa limitaziun dil diember maximal da screts da participaziun vala denton buca per la vischnaunca da Lumbrein.

A caschun da sia fundaziun surpren la SOEL dalla vischnaunca politica da Lumbrein la reit da transmissiun electrica e la reit da distribuziun ed ulteriurs implonts, parts d'implonts, sco era activas e passivas tenor la valetaziun dil biro d'inschigniers Brüniger + Co. SA. Ultra da quei surpren ella, tenor il contract davart valetas en naturalias, ina gliesta

cumpletonta cun activas da totalmein CHF 3'659'497.10 e passivas (capital jester) da CHF 156'674.75 per il prezi da CHF 3'420'000.—. Per quella summa emetta ella 34'200 screts da participaziun da mintgamai CHF 100.—.

In rapport en scret dils fundaturs el senn dad art. 834 al. 2 DO ei avon maun.

Art. 6

Quen annual

La bilanza ei da far mintgamai per ils 31 da december.

Art. 7

Responsablada

Per ils deivets dalla SOEL stat buna sulettamein la facultad dalla societad. Mintga responsablada persunala dils societaris ei esclusa.

Art. 8

Diever dils mieds

Sch'il recav lubescha, survegnan ils commembers che retrain energia ni fan diever dils survetschs colligiai cun quella, tariffas pli favoreivlas el rom dallas pusseivladads legalas.

Sch'ei resta suenter il manteniment e la completaziun dils implonts, sco era suenter ulteriuras activitads e retenziuns el rom digl artechel d'intent e dallas disposiziuns statutaras in recav schuber el senn dad art. 858 DO, sa quel vegnir impundius en favur da programs che promovon in'utilisaziun ni produzioni d'energia raziunala, efficienta e durabla.

Art. 9

Dretgs particulars
dalla vischnaunca da

Sch'ei semuossa a basa dil davos quen annual dalla SOEL

Lumbrein

che la mesadad digl agen capital ei buca pli cuvretga ni sch'ei dat per autras raschuns indezis preoccuponts per ina surdebitaziun, ha la SOEL da menar tractativas cun la vischnaunca da Lumbrein davart in eventual transferiment da parts digl implont e dil menaschi e da tut ils dretgs e dallas obligaziuns colligiai cun quels sin la vischnaunca da Lumbrein, sco era davart in transferiment dallas activitads da fatschenta dalla SOEL sin la vischnaunca da Lumbrein. En quei cass sa la vischnaunca da Lumbrein disdir immediat il commembradi senza risguardar in termin da disdetga. Ella ha immediat il dretg dalla restituziun dil capital dils screts da participaziun.

IV. Organisaziun

Art. 10

Organs

Ils organs dalla societad ein:

- la radunonza generala;
- l'administraziun;
- il revisurat.

A. Radunonza generala

Art. 11

Direcziun

Igl organ suprem dalla SOEL ei la radunonza generala. Ella seraduna ordinariamein ina ga ad onn, enteifer sis meins suenter la fin digl onn da gestiun. Radunonzas generalas extraordinarias vegnan convocadas, sche l'administraziun considerescha quei sco necessari ni sche silmeins in tierz dils commembers pretenda talas.

L'invitaziun allas radunonzas generalas succeda silmeins 20 dis avon il di da radunonza, indicond las tractandas che

vegnan publicadas egl organ da publicaziun official dalla vischnaunca da Lumbrein.

Sch'ei dat propostas per midar ils statuts, sto il cuntegn essenzial dallas midadas proponidas vegnir publicaus.

Art. 12

Dretg da vuschar e conclus

Mintga commember ha ina vusch alla radunonza generala. Cun agid d'ina plenipotenza en scret sa in societari seschar substituir entras in confamigliar ch'ei habels d'agir e che viva ella medema casa ni entras in auter commember dalla societad.

La radunonza generala ei cumpetenta da decider, sch'ella ei vegnida convocada conform als statuts. Las elecziuns e votaziuns vegnan fatgas cun scrutini, sch'in tierz dils presents pretenda quei. Resalvond in quorum legal ni statutar, basegna ei per prender decisiuns l'approbaziun dalla maioritad dallas vuschs. Per dissolver la SOEL e per midar ils statuts basegna ei l'approbaziun da treis quarts da tut ils commembers presents alla radunonza generala. Per midar ils statuts concernent art. 5 (screts da participaziun, surtut la valeta nominala/il diember maximal da screts da participaziun), art. 9 (dretgs particulars dalla vischnaunca da Lumbrein), art. 12 (dretg da vuschar e conclus), art. 14 (dretg da substituziun dalla vischnaunca da Lumbrein), art. 16 (cumpetenzza da decider, substituziun ed indemnizaziun) ed art. 18 (dissoluziun e liquidaziun) drova ei l'unanimitad dallas vuschs.

Art. 13

Cumpetenzas

La radunonza generala ha las suandontas cumpetenzas nuntransferiblas:

1. stipular e midar ils statuts;

2. eleger il president, l'administraziun ed il revisurat;
3. approbar il quen da gestiun e la bilanza, eventualmein decider davart l'utilisaziun dil recav schuber;
4. dar descharscha all'administraziun ed al revisurat;
5. decider sur d'expensas unicas che survargan la summa da CHF 100'000.-- ed expensas periodicas che survargan la summa da CHF 20'000.--;
6. decider davart tut las ulteriuras fatschentas, per las qualas la radunonza generala ei cumpetenta tenor la lescha ni ils statuts, ni las qualas l'administraziun suttametta alla radunonza generala.

B. Administraziun

Art. 14

Cumposiziun

L'administraziun secumpona da tschun commembers. La vischnaunca da Lumbrin ha il dretg dad esser representada cun ina persuna ell'administraziun. Ils commembers dall'administraziun vegnan eligi per treis onns ed ein reeligibels illimitadamein. Elecziuns enteifer ina durada d'uffeci valan tochen alla scadenza da quella. Cun excepziun dall'elecziun dil president seconstituescha l'administraziun sezza e determinescha siu agen uorden da fatschenta.

Art. 15

Cumpetenzas ed obligaziuns

L'administraziun ei cumpetenta el rom dallas disposiziuns legalas e statutaras per l'administraziun e per tut las fatschentas dalla SOEL, las qualas ein buca resalvadas expressivamein alla radunonza generala ed al revisurat.

Las fatschentas dalla SOEL ein da menar risguardond las reglas dalla precauziun commerciala, las disposiziuns finanzialas precedentas e las prescripziuns legalas.

L'administraziun sa instituir cumissiuns specialas. Ils commembers dalla cumissiun ston buc esser commembers dalla societad. Medemamein ei l'administraziun autorisada da transferir la gestiun ni singulas parts da quella e la substituziun corrispundenta sin ina ni pliras persunas che ston buc esser societaris.

Art. 16

Cumpetenzza da
decider, substituziun
ed indemnizaziun

L'administraziun ei cumpetenta da decider, sche quater commembers ein presents. Ella decida cun la majoritad dallas vuschs; en cass da paritad dallas vuschs decida la vusch dil president.

Decisiuns en scret prendidas unanimamein sin via circulara valan sco conclus valeivels dall'administraziun ed ein da nudar el protocol a caschun dalla proxima sesida da quella.

La SOEL vegn representada anoviars cun valeivladad giuridica entras il president, il vicepresident ed igl actuar ni il cassier, e quei cun suttascripziun collectiva en dus.

Ils commembers dall'administraziun e dil revisurat, sco era dallas cumissiuns dalla societad san vegnir indemnizai per lur activitad cun ina diaria moderada e cun la restituziun dallas spensas necessarias. L'administraziun ed ils incumbensai specials san ultra da quei vegnir indemnizai en ina moda moderada che corrispunda allas incumbensas ed alla carga da lavur. Tut las indemnizaziuns vegnan fixadas dil revisurat en convegnientscha cun l'administraziun. La summa totala dallas indemnizaziuns sto vegnir presentada separadamein el quen annual.

C. Revisurat

Art. 17

La radunonza generala elegia in revisurat per ina durada d'uffeci da treis onns.

Ella sa desister dall'elecziun d'in revisurat, sche:

- a) la SOEL ei buc obligada alla revisiun ordinaria;
- b) tut ils societaris approbeschan quei;
- e
- c) la SOEL ha buca pli che diesch plazzas cumpleinas ella media annuala.

La renunzia vala era per ils onns sequents. Mintga societari ha denton il dretg da pretender sin il pli tard diesch dis avon la radunonza generala ina revisiun limitada e l'elecziun d'in revisurat corrispudent. En quei cass vegn la radunonza generala buc a decider davart l'approbaziun dil quen annual e davart l'utilisaziun dil gudogn da bilanza tochen ch'il rapport dil revisurat ei buc avon maun.

La cumissiun da gestiun dalla vischnaunca da Lumbrein ei ultra da quei autorisada da prender da tut temps investa da tut ils documents da contabilitad dalla SOEL.

En cass ch'ei vegn renunziu ad in revisurat, ei la radunonza generala tuttina cumpetenta d'incumbensar la cumissiun da gestiun dalla vischnaunca da Lumbrein da controllar las activitads da fatschenta dalla SOEL.

V. Disposiziuns finalas

Art. 18

Dissoluziun e
liquidaziun

La SOEL vegn dissolvida, sche treis quarts dils commembers giavischan quei cun suttascripziun e

pretendan per quei intent la convocaziun d'ina radunonza generala extraordinaria. Alla radunonza generala respectiva ston treis quarts dils presents approbar la dissoluziun. L'incumbensa da liquidar la societad ei da surdar alla vischnaunca da Lumbrein che ha da procurar per in'utilisaziun adequata dalla facultad dalla SOEL.

Suenter l'amortisaziun da tut ils deivets vegn la facultad dalla societad utilisada per restituir ils screts da participaziun cun igl import nominal plus in tscheins commensurau. In'eventuala restonza vegn attribuida alla vischnaunca da Lumbrein per garantir e promover il provediment d'energia.

Art. 19

Publicaziuns

Las comunicaziuns ed ils invites als commembers vegnan publicai egl organ da publicaziun official dalla vischnaunca da Lumbrein ni tarmess en scret a tut ils commembers dalla societad. Ils organs da publicaziun dalla SOEL ein il Fegl official svizzer da commerci ed il Fegl official dil cantun Grischun.

Art. 20

Dretg subsidiar

Sche quests statuts cuntengan neginas disposiziuns divergentas, valan las prescripziuns legalas dil Dretg d'obligaziuns svizzer.

Art. 21

Entrada en vigur

Quests statuts vegnan approvai dalla radunonza dils fundaturs ed entran en vigur cun l'inscripziun el register da commerci.

Ils fundaturs:

(Flurin Capaul)

(Martin Capaul)

(Erwin Capeder)

(Giusep Capeder)

(Giusep Casanova)

(Gian Derungs)

(Anton Pelican)